

四庫全書

史部

欽定四庫全書

欽定八旗通志卷一百八十一

人物志六十一

大臣傳四十七

滿洲鑲藍旗四
滿福 額僧格

鄂爾泰 邁柱

鄂爾泰

鄂爾泰滿洲鑲藍旗人姓西林覺羅世居汪欽高

祖屯泰

國初率族來歸授佐領曾祖圖捫天聰五年從征明

大凌河力戰陣歿授騎都尉世職雍正三年入祀
昭忠祠祖圖彥圖襲世職官戶部郎中父鄂拜國
子監祭酒鄂爾泰由舉人於康熙四十二年襲佐
領授三等侍衛五十五年遷內務府員外郎雍正
元年充雲南鄉試副考官

特擢江蘇布政使三年八月授廣西巡撫十月

命署雲貴總督四年五月貴州狎苗負險肆橫議撫久無
成鄂爾泰分三路進剿一由谷隆一由焦山一由

馬落孔焚其寨七進克長寨羊城壘等奏於長寨
增駐遊擊又以鎮遠土府刀瀚雷孟土州安于蕃
兇詐計擒之者樂甸土司刁聯斗乞免死歸流奏
給職銜示鼓勵尋奏狎苗及川販窩黨悉就擒

上嘉其成功速優叙加三級又奏經理狎苗事宜十條一
未獲犯中脅從者自首槩寬免一苗民失耕種期
免本年正賦一歸寨者月給米鹽撫卹並給籽種
逾一月未歸田土賞兵一苗多佔地仇殺令契開

明界址官給印信承業一同名各照祖姓造冊不知本姓者為立姓一軍器志繳隱匿及私造處決一兵不得欺凌官不約束嚴叅一移貴陽府同知駐長寨化導一移長寨把總駐打壤寨控制一員升聞刦掠即拏一面申報獲犯會審毋袒徇部議從之十月寔授總督先是四川烏蒙土司祿萬鍾擾東川府與滇接鄂爾泰奏改東川隸滇從之

命會同川督岳鍾琪辦理烏蒙事嗣招其魁祿鼎坤為土

守備萬鍾不就撫至是檄總兵劉起元整兵直入
各寨投誠萬鍾遁鎮雄五年正月潛投四川被獲
解鍾琪軍前其黨鎮雄土司隴慶侯亦赴川繳印
獻土敘功加二級

特旨給騎都尉世職三月鎮沅猺賊戕官焚掠勦平之獲
賊首刁如珍等又廣西土府岑映宸淫虐鄂爾泰
曾奏

敕懲治

上命廣西巡撫韓良輔赴滇面議用兵鄂爾泰以滇粵相距遠貴州安籠與泗城接即親往商六月映宸惶懼乞改流存祀奏革世職免罪安置浙江原籍給其弟映翰頂帶奉其祖岑繼祿祀七月同楚省會勦諤冲花苗擒其渠餘衆歸順九月擒威遠猺賊扎鐵匠降新平野賊李百疊等議叙加三級十一月招撫長寨後路生苗百八十四寨編戶口定額賦得

旨嘉獎加授一等輕車都尉十二月攻破雲南猺賊窩泥種其六茶山地十餘里劃界建城設員弁議叙加二級先是前任雲貴總督高其倬查奏安南國界有內地舊境百二十里應清理於賭呪河立界國王黎維禔奏辯復

命鄂爾泰清查給與八十里於鉛廠山下小河以內四十里立界

頒敕曉諭至是六年正月國王具表謝鄂爾泰以

聞

上嘉其知禮仍

賞給地四十里又奏烏蒙設鎮駐總兵改貴州威寧鎮為
營置叅將與鎮雄東川二營歸統轄並烏蒙設府
治改鎮雄為州隸之俱議行三月勅擒東川謀逆
之法憂伙目禄天佑則補營長禄世豪等又米貼
土目禄永孝緣罪斬候妻陸氏勾猓獠反調總兵
張耀祖等攻門坎山所向皆克擒陸氏米貼平時

廣西懷顏光色等不法提督田峻不能勦鄂爾泰
調兵至賊殺光色等降

特命總督雲貴廣西三省事務七年正月雲南卿雲見由
一等輕車都尉加授三等男三月疏奏貴州丹江
難講生苗向不服化前檄按察使張廣泗相機勦
撫今攻克各寨苗衆投誠其上下九股及清水江
古州等處以次寧帖叙功加二級九月奏乞銷去
苗疆議叙

賞給曾祖圖捫封典俾昭忠祠牌位改書贈官

久之其苗疆功仍議叙尋加少保十二月奏新闢苗疆立
營設官事宜一八寨距都勻府九十里地方遼濶
改都勻營為協設副將駐劄一丹江逼凱里素為
生苗盤據增丹江營設叅將一九股尤強悍移黃
施營遊擊駐施秉舊縣一清水河有南北兩岸居
中增清江協設副將一鎮遠協原防清水江生苗
今改為營設叅將歸清江協一天柱營近生苗向

設叅將今既分設營汛改為都司一古州為都司
黎平要隘設古州鎮駐總兵改黎平協為營聽統
轄一營汛既定設文員分駐增都勻府同知一駐
八寨通判一駐丹江鎮遠府同知一駐清江黎平
府同知一駐古州俱加理苗字樣一所設同知通
判於各駐官兵內各撥把總兵丁為親標護衛一
施秉舊縣添設施秉縣縣丞分駐從之八年八月
烏蒙猺賊結凉山等蠻反總兵劉起元被害祿鼎

坤侄萬福與賊合鄂爾泰飭諸將進討叅將韓勲
大敗賊於奎鄉總兵哈元生復烏蒙同攻克大關
與川兵會十二月擒萬福渠克盡獲奏入

諭曰烏蒙改設府治之初諸事尚未就緒又值劉起元不
善撫馭激成事端逆黨勾連幾有猝難收拾之勢而將
弁軍士奮勇爭先旬月間削平寇亂此皆鄂爾泰平時
節制封疆以公忠表率官僚以義勇訓練將士而臨機
應敵又復調度有方用能迅奏膚功永安苗境論功行

賞當以鄂爾泰為先但念該督自聞賊變以來時時以先事疎防引過自責今軍事告竣不肯自居蕩寇之功屢次陳奏情詞懇切朕曲從其請以成其謙抑之素志

九年六月疏奏烏蒙善後事宜烏蒙鎮舊設中左右三營請增設前營四營各遊擊一守備一千總二把總四中營駐府城左營駐大關右營駐永善前營駐涼山鎮雄東川二營俱增設守備一分左右軍左軍守備各駐府州城鎮雄右軍守備駐奎

鄉東川右軍守備駐阿白溪又改威寧營為協設
副將仍歸烏蒙鎮轄尋甸州增奇兵營設叅將歸
督標轄從之尋奏全滇水利事宜一濬嵩明州之
楊林海周圍草塘可開墾一宜良縣開河五其四
灌田惟江頭村舊河形高自胡家營北另開一道
資灌溉一尋甸州尋川河有石難疏另濬沙河十五里一
東川府城北漫海地肥水消令民承墾一浪穹縣羽河等
處加脩堤工一臨安等處修築工程暨通粵河道嵩明州

河口俱查勘以時興工下部議行十年正月

陞見二月授

保和殿大學士兼兵部尚書辦理軍機事務

諭曰大學士鄂爾泰節制雲貴廣西三省歷有歲年于所屬苗疆悉心經理使蠻夷慕義向風咸登樂土至於古州等處生苗自昔未歸王化鄂爾泰運籌調度勦撫兼施俾苗人懷德畏威抒誠內嚮疆圉開拓邊境輯寧數年以來功績寔非尋常可比鄂爾泰著授一等伯爵世

襲固替四月

諭曰朕與鄂爾泰面加商酌新疆遼濶兼有內地舊汛非古州一鎮所能統轄都江清水二江地界形勢兩路劃然牽合歸一終難控禦而古州鎮處都江適中清江協處清江適中遙對雄峙各踞要區若于清江協裁去副將改設一鎮將新疆之丹江營與內地之銅仁鎮遠黃施天柱石阡平越等協營俱歸管轄其餘都勻協黎平營並新設之上江下江諸協營俱隸古州鎮轄則數千

里苗疆可無鞭長不及之慮更屬妥協著將清江協改鎮時大軍勦準噶爾七月

命督巡陝甘經畧軍務九月奏報我兵敗北路賊於額爾得尼昭賊遁必由畢濟一路中有袞塔馬哈戈壁係要隘咨行署寧遠大將軍張廣泗遙將弁堵截並令廣泗繼進以壯勢援得

旨嘉獎又奏屯田事宜一總理屯田大員頒給關防一客民首報地畝分別給工價其夫役等工價口糧外

加賞衣帽銀一夫役在甘涼肅雇募地方官出結
免逸沿途給口食並築土堡容居一屯田諸務
令所有司協理一各項支用銀令總理屯田大
臣奏報在軍需銀內支者另行報銷十一年五月
奏言明歲大兵前進阿勒台應先將特斯台錫里
二處所駐兵今秋移至科布多水草佳處并於北
卜堪察罕鄂羅木築堡守視臺站運路又於塔本
托羅海額克阿喇勒默爾根西納所在各駐兵四

千侯進勅時即前至科布多候調遣俱從之六月
還京

命仍兼兵部事十月充八旗通志館總裁兼署吏部十二年
二月叅奏兵部堂司造冊濛混冒銷駟站錢糧

上以寔心任事議叙加一級七月署鑲黃旗滿洲都統十
三年正月充

皇清文穎館總裁五月台拱逆苗叛鄂爾泰自以從前籌
畫未周請罪並陳疾乞

賜罷斥削伯爵暫假調理得

伯卿才品優長忠誠任事歷經簡用未負朕恩今以抱病
虛羸懇請罷斥情詞皆寔著鮮大學士之任削去伯爵
俾得悉心調攝至於古州苗疆從前石禮哈等皆曾奏
請用兵朕悉未允行及鄂爾泰為滇黔總督以此事必
應舉行剴切陳奏朕以鄂爾泰居心誠直識見明達况
親在地方悉心籌畫必有成筭始允所請命其慎重辦
理彼時苗民相率向化成功迅速朕心甚悅特錫伯爵

以獎勲庸乃平定未久苗即數次蠢動近則直入內地
煽惑熟苗焚劫黃平一帶郡邑居民受其擾害朕詢問
情由鄂爾泰亦以出於意外為詞是從前經理之時本
無定見布置未協所致則朕一時之輕率誤信亦無以
自解國家錫命之恩有功則受無功則辭乃古今之通
義今鄂爾泰請削伯爵於情理相合朕鑒其悃誠而俞
允之並將前後情事宣諭中外以示吾君臣公而無私
過而不飾之意尋

命仍留三等男爵八月

今上御極

命同莊親王允祿果親王允禮及大學士張廷玉總理
事務十二月

詔授一等輕車都尉併前男爵為一等子乾隆元年二
月充會試正考官七月充三禮義疏總裁二年五
月充農書館總裁八月

命查勘直隸河道九月奏言永定河上游無分洩下游

不得暢達以致為患請於半截河堤北開新河即
以北堤為南堤沿之東下入六道口經三角淀北
至青沽西入大河更作洩潮埝數段俾沙停埝外
水歸河中則下口無阻再於上游河身自半截河
以上挑濬深通南北岸分建滾水石壩四各開引
河一合清隔濁補救無難又言千里長堤為數十
州縣保障隸霸州保定文安大城境者最險要今
年風浪摧壞擬於淀河出口處至陶家營築培堤

工照底濶頂突法修成坦坡形龍堂灣轉角處補築月堤以資重障疏大堤對岸支河淤淺禁攔河疊道俾得暢達又言靜海縣北之獨流內受淀水外當河道亦最險處請於東岸建滾水壩開引河注之中塘窪疏通下口達海建閘防潮下王大臣等議行十一月

命為軍機大臣兼領侍衛內大臣十二月以總理事務議叙由一等子加授騎都尉併為三等伯

賜號襄勤三年兼議政大臣四年二月充

經筵講官先是南河河道總督高斌請開新運口論者以為不便至是

上命鄂爾泰閱視四月奏言漕河運口因時制宜屢經改易今所建新口離黃稍遠可避倒灌不無小效臣愚以為可用惟挑水壩稍短應再築長壩寬圍過水口如磨盤墩式俾外逼大溜抵黃內引迴流入運其新運口內頭二三壩向東轉北即天妃閘

舊運河路自三壩向東南灣轉而北過越閘即河臣
擬改新運河路舊河直捷新河紆曲為漕運計應
行舊河今新建閘壩俱未開仍取道天妃閘既屬
便利永宜遵行又言陶莊引河長而稍曲旋開旋
淤築引河法宜徑直乃能迅駛刷沙並須頭迎溜
尾順溜放水及時臣擬定河頭於舊之東迎溜處
東北直下四百六十餘丈尾對惠濟閘仍係順溜
俟大溜盛時開放再於對岸上流二壩三壩間接

築挑水大壩令黃水全勢趨北倒灌之虞可免得
旨如所請行又言湖河機要三事一天然二壩不宜開
免湖水全洩並興化鹽城等縣水患一毛城鋪壩
已經變遷宜酌復河臣靳輔舊規一治法莫善於
挑引河取直兼放淤培岸省埽壩費下大學士九
卿議從之時河東提河白鍾山奏請復漳河故道
諭鄂爾泰於歸途勘奏尋奏言漳河故道有二由山東
邱縣城西者舊跡全湮難以開通由城東者疏浚

較易應自和爾寨村東承漳河北折之勢接開十
餘里至漳洞村入舊河即於新河頭下東流入衛
處建閘衛水弱啟以濟運足用則閉再於青縣下
另建閘壩酌水勢分洩以保萬全從之五月加大
保七年三月充

玉牒館總裁十二月副都御史仲永檀以密奏留中事洩
于鄂容安

命王大臣鞠寔請將鄂爾泰革職拿問

諭曰仲永檀如此不端之人鄂爾泰於朕前屢奏其端
正黨庇顯然久在朕洞鑒中若欲將伊革職拿問則
已於前日降旨何待爾等今日之奏請蓋以鄂爾泰乃
皇考遺留之大臣於政務尚為諳練若以此事深究不但
罪名重大承受不起而國家少一能辦事之大員為
可惜耳但其不擇門生之賢否不訓伊子以謹飭朕
亦不能為屢寬也鄂爾泰著交部議處以示薄罰尋
議降二級調用奉

旨抵銷留任八年管翰林院掌院事十年正月以疾請解

任調理

上慰留三月加太傅四月卒遺疏入得

旨大學士鄂爾泰公忠體國直諒持公久任邊疆茂著
惠績簡預機務思日贊襄才裕經綸學有根柢不愧
國家之柱石允為文武之儀型嚮用方殷倚毗正切
昨冬忽嬰痰疾朕心屢念遜醫調治存問日頒今春
病勢有加朕往看視加銜太傅冀其獲痊不意竟至

不起朕心深為震悼親臨祭奠輟朝二日披覽遺疏
具見忠君愛國之惓忱尤為追念不置昔

皇考有配享

太廟遺詔著該部遵奉舉行並入賢良祠加祭二次尋

予祭葬諡文端二十年甘肅巡撫鄂昌與詩詞悖逆之

胡中藻倡和事覺革職治罪

諭曰胡中藻係鄂爾泰門生且與其侄鄂昌敘門誼則
鄂爾泰從前標榜之私適以釀成惡逆其詩中讒舌

青蠅供指張廷玉張照二人即張廷玉之用人亦未必不以鄂爾泰胡中藻為匪類也鄂爾泰張廷玉亦因遇

皇考及朕之君不能大有為耳不然何事不可為哉使鄂爾泰尚在必將重治其罪為大臣植黨者戒著撤出賢良祠四十四年

御製懷舊詩列諸五閣臣中

詩曰業師祇三人其三情向剖

皇考重英賢率

命書房走鄂蔣以閣臣蔡法列卿九胡顧劉梁任邵戴
來先後其時學亦成云師而實友不足當絳帷姓名茲
舉偶鄂其中巨擘內外勤宣久初政命總理顧問備
左右具瞻鎮百僚將美惠九有好惡畧失尚性陽
陰則否遵

詔命配享旌善垂不朽鄂爾泰弟鄂爾奇康熙五十一年
進士改庶吉士散館授編修雍正元年三月充山

西鄉試副考官六月遷侍讀七月擢詹事府詹事
四年五月署國子監祭酒九月授工部侍郎五年
教習庶吉士六年調禮部七年充順天鄉試正考
官八年充會試副考官尋

命總理國子監事署兵部侍郎九年陞戶部尚書兼管步
軍統領十年充繙譯鄉試正考官十一年九月直
隸總督李衛劾鄂爾奇提拿越控細事濫用部牌
庇護私人並壞法營私恣制擾民各款

命革職交王大臣等會鞫得寔請加倍治罪得

旨鄂爾奇受朕深恩有玷職守大負伊兄鄂爾泰教訓理
宜從重治罪朕念鄂爾泰裨益國家政務甚多以之相
抵鄂爾奇加倍治罪之處著從寬免十三年卒鄂爾泰
子六鄂容安鄂實鄂弼鄂寧鄂忻鄂謨鄂容安鄂
實鄂弼皆自有傳

邁柱

邁柱滿洲鑲藍旗人姓喜塔臘康熙四十八年三

月由筆帖式授國子監助教十二月遷工部主事
五十一年十一月遷戶部員外郎五十四年四月
授監察御史五十五年九月巡視福建鹽課雍正
元年巡視寧古塔三年十二月

命往湖廣荊州同將軍武納哈籌議以原任將軍阿魯家
產抵還扣剋兵丁銀兩事合疏覆奏令荊州就近
一百五十里內有窮民情愿賣地者官給時價置
買或給兵丁耕種或給民種起租遇窮乏兵丁有

婚事者給銀十兩喪事給銀二十兩其官員子弟及饒裕兵丁不得濫給以期永遠有益下部議從之三月擢工部右侍郎七月調吏部

命往江西審理德安知縣蕭彬武寧知縣廖科齡虧空並清查通省錢糧民欠流抵諸弊尋

命署江西巡撫十二月疏請以江西省額徵丁銀照直隸等省之例攤入地糧從之五年二月授湖廣總督命料理江西錢糧事務完畢赴任三月奏江西倉穀虧缺

其弊有三一在無穀無銀捏報寔貯在倉及至交代又捏報發價在民或借領在民俱以素日信用書役人等公具認領新任官按名徵追顆粒俱無一在出糶倉穀得價侵收及至交代槩以二錢一石折筭交出接任者因不敷買補以致倉貯久懸一在虧空報完以銀二百兩抵穀一千石因價不敷積久不能買補併價亦侵用又捏稱民欠多方掩飾皆由前任巡撫裴率度布政使陳安策張楫

徇庇所致請察究追完

詔革裴率度等職質審究追又言江西公用銀兩原係提解官役俸工及節規恐州縣無可養贍或致那墊虧空亟宜裁革但通省需費甚繁惟有比照河南湖廣等省之例提解各州縣耗羨二分以充公用另提解一分五釐及六厘四厘不等斟酌均勻為各員一歲養廉之資其餘概留州縣自行養贍則通省之用無虧各員俱有養廉不至私行派累至

巡撫衙門向有平餘一項為薪水之資今既議裁亦於提解一分五厘耗羨內與司道量行支用又現在被災州縣設廠煮賑米價每石已至一兩三四錢將來勢必愈昂酌定未被災州縣有產米稍多米價畧賤者預發價銀委員分買運發被災州縣貯備俟青黃不接時照原買之賤價平糶則市價自平又安南贛州為閩廣交界之區最易藏奸鄙陽湖岸址渺茫出沒難稽萬載寧州十數處又係

聚集棚民流匪素好多事雖時處太平武備不可
不講現已嚴整臺汛操演標兵添設藤牌挑刀等
械補寔空糧以充營伍得

旨嘉其條畫詳晰令新任巡撫照行六月疏言南昌前衛
饒撫二所屯糧屯丁屬江南之建德東流二縣徵
比而督催仍在南昌饒撫三府隔越千里鞭長不
及請以此項編徵改隸江南池州府掌管下部議
行八月審奏虧空知縣蕭彬等俱論斬並請令狗

庇之上司分賠一分得

旨邁柱身為現任督撫若非秉公持正實能自信無一毫賠碩者不能如此甚屬可嘉交部議叙上司分賠一分之處從前未曾定例仍照舊完結自雍正六年以後俱照所請永為例部議邁柱加三級十二月赴湖廣總督任六年正月奏堤工八事一每年修堤業戶按糧均派有賣富差貧以少派多之弊應確估土方夫數及每糧一石應出夫數造冊存案仍出示曉諭

使業戶悉知以杜浮開濫派之弊一長江大隄漫
溢時多應相舊隄之勢無人行走之處修加土一
尺人馬往來之地修加土一尺五寸增寬之數亦
如之不如式者所司以溺職論一向來修隄諸弊
非不嚴禁無如陽奉陰違應令照河工例治罪其
包折夫工者照包攬閘夫溜夫之律一名杖枷二
名以上附近充軍一護隄插柳以一弓一株為準
連種蘆荻如所司奉行不力以誤工論一州縣雖

各有疆界田畝同一隄塍豈分彼此應定例同隄
有險無分隔屬水利各官業戶協力搶護推諉抗
阻者治罪一支河曲港及隄內溝洫應責成水利
各官于冬晴水涸時督同業戶盡力深濬度其形
勢或設木閘或砌瓦筒以時閉洩庶旱澇無虞一
隄塍衝潰之處必積浮沙速加土填根脚難固應
剗刷至底然後層土層砌引錐鑕試灌水不漏者
方為堅寔草率者責令賠修一隄外沙礫不堪取

用隄內取土又憲潰溢無常應于農隙時水利及
印官率民預為擇地取土酌量壘積險隄高廣之
處無事可作歲修有險可以搶救亦思患預防之
一策

諭獎辦理允當三月疏報各屬隄塍業戶按糧派夫照上
年水痕加高修築支河亦自行挑濬

諭曰修築江隄百姓踴躍從事可嘉宜沛特恩賜帑銀六
萬兩令邁柱酌量工程多寡分給使小民均沾寔惠工

程永遠堅固以副愛養楚民至意四月奏鎮筰凶苗倚恃險阻野性難馴時入內地竊劫害民雖特設重鎮多布汛防必待轉報而後遣兵凶苗已遠颺竄匿難於弋獲臣廣為諮訪聞原任雲南提督張國正先任鎮筰總兵以雕勦之法治苗甚善凡遇失事探寔賊蹤為何寨何苗一面飛報一面携兵馳往圍寨搜擒出其不意如雕之捕鳥取其疾速而鳥可必得也諸苗畏憚大斂凶鋒臣今與總兵周一

德循行此法但期得獲罪犯而止不敢過為殺戮
以廣

皇仁得

旨據理而論制服凶苗自當如此但情形究難遙度全賴
大吏詳審熟籌方收因地制宜之效六月疏請移漢陽
府通判駐漢口鎮荊州通判駐沙市又請裁施州
大田二衛所併為縣尋定縣名曰恩施九月奏請
清查湖北積年舊欠銀二十萬七千餘兩湖南舊

欠銀一十一萬餘兩得

旨與巡撫馬會伯王國棟一同辦理十一月疏言各州縣起解錢糧例有两文一批一文投巡撫衙門掛發一文同批投藩司衙門兌收並同錢糧交與解役解役與庫書一氣多有壓匿文批將錢糧不歸藩庫徑交庫書之家折分那用及放債圖利等弊巡撫藩司均難知覺請嗣後起解錢糧令先期三日將現解某項某數錢糧于某日起程緣由具文由鋪

通通報府道督撫各衙門併將某州縣離省路程
於文內聲明如逾限不到即嚴行查拿既杜侵盜
之弊亦可免中途遲滯疏失之虞下部議通行各
直省一體遵行七年三月疏請以湖廣省額徵丁
銀攤入田糧其續報勸墾及自首隱匿所報陞科
俟再遇編審時攤入從之五月以永順保靖桑植
土司改土歸流請於永順設知府府東南西北各
設一縣保靖桑植地各設一縣從之尋定新設府曰

永順其東南縣曰永順西北縣曰龍山保靖桑植所
設縣仍其名七月奏湖南積欠十一萬已完過六
萬六千兩湖北積欠二十萬七千已完過八萬四
千兩又條奏苗疆事宜一湖南民人往苗土貿易
者令將所買何物行戶何人運往何處預報明地
方官給與印照註明姓名人數知會塘汛驗照放
行不得夾帶違禁之物如有官吏兵役借端需索
者一併查究一苗人至民地貿易請於苗疆分

界之地設立市場一月以三日為期互相交易不得越界出入仍令各州縣派佐貳官監視一苗疆州縣請選擇諸苗悅服之人立為苗長以稽捕緝之事三年無過量為獎賞其有生苗歸化者給以寨長千百戶執照三年無過亦予獎賞造冊彙報兵部一請照川省之例於苗疆州縣選安分勇敢之土苗每處用一二十名充當民壯以備差遣訪緝仍行文武互相覺察之法以防勾通推諉等弊

俱下部議行八年七月疏言永州府屬之道州寧遠永明江華四州縣與廣西接壤應添設官兵以資防守請改永州府同知為理徭同知移駐江華城中控制上五堡等處管理四州縣苗疆捕務仍於道州江華各設遊擊一員千總一員寧遠永明各設守備一員抽調各標營兵一千五百名每月與廣西桂臨營訂期會哨三次於地方寔有裨益下部議從之八月奏沔陽錢糧自康熙五十五年

至雍正四年積欠銀八萬九千二百餘兩里民一
聞清查爭先完納其實在民欠乞與一年之限分
作三次徵收以紓民力有官侵役蝕包攬未完者
請暫緩究治一年追完逾限治罪

上諭戶部曰朕之清查積欠者原以地方貪官污吏及不
法衿棍借民欠之名恣意侵蝕不得不清釐懲治今果
查出沔陽州侵蝕包攬銀三萬餘兩而里民之間有拖
欠者因田地近水常有滂溢力量未免不敷並非有意

頑抗俟冊到日酌量豁免今即停止催徵其侵蝕包攬者照所請辦理九年二月疏言黔苗不靖請停止湖南醴陵桂東等十二州縣礦山開採以絕歲奸又疏言湖南各營兵米例以六錢折給今改設永順三營係新闢苗疆產米既少商販亦稀價值昂貴請自雍正九年為始永順以一兩折給保靖桑植以八錢折給

上是其言俱如所請三月邁柱遵

旨將沔陽州實在民欠糧銀三萬二千餘兩分晰造冊

具奏

諭曰朕愛養元元時下減賦蠲租之詔每思豁除舊欠則
頑戶獨得蒙恩蠲免新糧則善良公同被澤此天下人
所共知惟是沔陽民欠與他處不同該州近水常有滯
溢之患其未完民欠從寬豁免十年十二月奏給價收
繳六里鎮草土司藏用烏鎗其木桅机弓各色完
整者撥給兵丁充用餘不合式製者改造鋤犁農

具賞給力田土苗得耕作之實用至於土苗所用
環刀標鎗不宜比戶藏蓄亦令逐漸給價收繳

諭曰所奏深得賣刀買犢之意至環刀標鎗亦自應收繳
可順其願不宜強迫又疏言收捐貢監穀石原為充裕
積貯且備江浙等省緩急撥用現今川米禁販不
得到楚江浙等省搬運甚多各省米價日增若本
省仍收捐納穀石必甚昂貴請暫行停止從之十
二年九月疏言本年楚省大稔前兩年停收捐貢

監穀石應仍收捐但楚省向日議捐原以裕常平
積貯兼為鄰省緩急之需今隣省俱嫌倉穀貯久
色變自赴產米地方採買不必代為豫備至楚省
常平倉貯穀一百十四萬三千餘石又社倉貯穀
四十五萬四千餘石現今俱屬充裕隣省又無赴
倉買運若將應行流通之穀多積於不待用之地
似非隨時制宜之道況戶部暨雲貴廣西甘肅江
浙等省皆因軍需海塘急務現有收捐事例更當

酌量緩急停止楚省收捐貢監俾願捐者赴戶部
雲貴等省捐收折色以濟急需

上是其言下部議行十三年三月奏准改容美土司地為
州其所屬五峰司地設縣治改彝陵州為府尋定
新政府曰宜昌附郭縣曰東湖容美所設州曰鶴
峯五峯所設縣曰長樂并原立之直隸歸州長楊
興山巴東皆隸焉又於恩施縣建府治曰施南設
宣恩來鳳咸豐利川四縣七月疏言前於湖南永

定九谿二衛適中之地建設安福縣治人民田賦
附近安福者歸安福遠在各屬者撥歸各屬惟二
衛撥歸慈利永順二縣所徵屯糧疆界不清民屯
參互官民多有未便永定衛四面環山一水四達
人民聚居商賈輻輳請於永定衛地添設一縣以
原撥永順慈利二縣所轄軍戶與慈利縣分出民
人并現在改土歸流之茅岡司地計周圍八百餘
里建縣治設知縣一員典史訓導各一員下部議

從之尋定所設縣曰永定是月

諭曰邁柱簡任封疆宣力有年授為大學士來京辦事八

月授武英殿大學士兼吏部尚書

今上御極

命暫管湖廣總督事十一月來京乾隆元年二月兼管
工部二年十一月以病罷兼部務尋解任三年
正月卒年六十有九

賜祭葬如例謚文恭

滿福

滿福滿洲鑲藍旗人姓瓜勒佳康熙五十二年襲
世管佐領雍正五年授三等侍衛署叅領乾隆三
年授護軍叅領七年擢蒙古廂藍旗副都統九年
轉護軍統領十三年二月授熱河副都統四月擢
古北口提督七月調拉林副都統二十年授都
統駐巴里坤

諭率吉林兵千馳赴軍營二十二年七月

命駐防吐魯番尋授領隊大臣八月定邊將軍成袞扎
布由珠勒都斯一路進勦請令滿福以兵三百巡
查阿勒輝袞西喇及烏納哈特十三台站搜勦嗎
哈沁
允之九月沙拉斯嗎呢斯既降復叛掠台站

諭滿福由阿勒輝往勦十月偵賊竄呼魯木什烏蘭和
屯由巴顏阿瑞追緝

詔巴里坤辦事大臣阿里袞馳往協勦兵未合滿福遇

賊於肯色嶺擊之賊敗走有沙拉斯得木齊敦多克哈什哈嗎唬斯得木齊敦多克車凌者偽遣人乞降且言賊酋已就擒請除道迎滿福信之時我兵僅二百七十餘行次哈喇和落徑險林密下有深溝滿福悟為賊所紿急麾前隊返賊千餘突出林中我兵被圍滿福厲聲大呼力戰被鎗墮溝中死之事

聞

諭曰滿福雖為賊所愚究屬捐軀盡節著照陣亡例議卹尋

賜祭葬謚毅入祀昭忠祠

命圖形

紫光閣儒臣擬贊曰言率新附渠酋是擒而何汙裸
鼠首狼心遇伏不撓穿齟賊輩睽彼陣雲精英不
昧

額僧格

額僧格滿洲鑲藍旗人西安將軍尼雅哈之孫郎
中額爾奇之子康熙五十七年由護軍補護軍校
雍正三年襲佐領十年管本旗左司事乾隆元年
襲曾祖倭和訥軍功所得雲騎尉三年授副叅領
九年授山西老營堡叅將十四年補撫標中軍叅
將十五年遷四川督標中軍副將十八年二月擢
山西大同鎮總兵九月勦四川雜谷軍功議叙加
一等紀錄二次二十年十二月因買補營馬由臺

站馳奏得

旨朕令陝甘山西各督撫提鎮將買缺額營馬每月奏聞祇欲伊等上緊購辦隨時奏聞非緊急軍務刻不可緩者比原可照例齎奏不必擅動驛馬乃大同鎮總兵額僧格奏買補營馬一摺由臺站馳遞殊屬不知緩急着該部行文各督撫提鎮嗣後此等奏報仍令自行遣人齎奏不得擅由臺站馳遞二十三年四月

召見

賞戴孔雀翎六月署甘肅提督二十四年十二月因辦
解馬匹議叙隨帶軍功加一級二十五年七月署
固原提督二十六年二月奏稱陝甘兩省兵有前
在軍營暨屯防處隔營挑補因所補糧缺距籍遙
遠改補本營查例載綠營辭退兵內復挑補名糧
者即作為新兵所食錢糧年分俱不合算遇陞用挑
選不准列名臣伏思効力戎行官兵皆蒙

皇上軫念無不沛施

鴻恩今陝甘兩省出師兵丁隔營挑補者甚多若於改補後作為新兵遇陞缺出不准列名挑選從前出力之處俱湮沒甚非


皇上軫念戎行之至意仰懇

皇上天恩凡軍前効力兵丁如有隔營挑補不能遠離願調本營者即以本營兵缺坐補仍將原食錢糧年分効力行走之處造入冊內遇有自軍營隔營

挑補之兵亦照此辦理得

旨准行二十八年六月

命駐喀什噶爾辦事三十年二月烏什逆回滋事額僧
格率兵從伊犁將軍明瑞進剿八月賊平三十一
年五月授寧夏將軍三十二年調補杭州將軍三
十三年九月卒



欽定八旗通志卷一百八十一

欽定四庫全書

史部

欽定八旗通志卷

一百八十二至
一百八十三

欽定四庫全書

欽定八旗通志卷一百八十二

人物志六十二

大臣傳四十八

滿洲鑲藍旗五
鄂容安常祿保

和起

瑚爾起

和起

子和隆武

和起滿洲鑲藍旗人姓馬佳高祖阿音布

國初以軍功授騎都尉世職康熙六十一年和起襲

乾隆四年授

盛京協領十二年授廣州副都統十四年調寧夏副

都統十九年五月

命偕侍衛海福率寧夏兵千赴北路軍營二十年正月授寧夏將軍二月定西將軍永常劾和起等所率兵不及額請議處

諭曰寧夏兵一千原定於四月內前赴軍營後因歸於哨探兵隊內令和起等催儻前進伊等隨將輜重留後派兵百名守護止領九百名遄行尚屬奮勉且已

具奏在前非無故遲留可比著從寬免其議處七月
以達瓦齊就擒撤寧夏兵還仍令和起統之尋

命偕提督豆斌為巴里坤辦事大臣十一月以遊擊王
國士運糧遲誤

諭曰軍營糧餉關係緊要理應加意辦理何以王國士
派委運糧半月僅行六臺必係僅派綠旗兵運送以
致如此遲悞和起等辦理甚屬錯謬現在滿洲及索
倫察哈爾兵丁調集巴里坤若交伊等運送不但行

走迅速且于運糧之便直抵軍營一舉兩得況新降
達什達瓦人衆此際已應至巴里坤附近地方伊等
熟悉路徑與兵丁同運更為有益此皆和起等應行
籌辦之事乃並未籌及所司何事着傳諭和起豆斌
等遵旨悉心辦理十二月定西將軍策楞奏屢檄和
起等將補給兵丁及甘州肅州續到之馬速解軍
前至今未到

詔令明白回奏並交部議革職留軍營効力得

旨從寬留任二十一年正月

特予開復和起奏言涼州寧夏等處所解馬疲斃過多
臣派員在巴里坤分收俟臚壯挑用仍先照數補
解以利軍行請將委員議處部議從之二月給

欽差大臣關防五月

諭曰和起在巴里坤辦事甚屬黽勉著馳驛來京面聆
訓示再往軍營同叅贊大臣兆惠籌辦一切事宜先
是達什達瓦所屬宰桑訥默庫曼集烏達瑚們都

等自軍營私回游牧奉

旨鞠治六月

諭曰現據和起將訥默庫等擅回游牧之處訊明復以伊等係新降之人未諳法律陳奏殊屬謬誤達什達瓦屬人歸誠以來疊施厚恩及派往軍營効力又與內地兵丁一體賞給製裝銀兩乃敢不遵法令擅帶兵回至游牧情罪甚屬可惡昨經和起等奏到朕即降旨令將訥默庫曼集等正法其兵丁係聽從指揮

加恩寬免所以不將兵丁一併治罪者特因伊等新
降姑從寬典至宰桑乃領兵之人豈得曲從寬宥和
起等審訊既確復為此奏其意惟恐訥默庫等正法
後致達什達瓦屬衆心懷疑貳妄生事端果有此情
正當使知法律森嚴不容輕犯安得苟且姑容以示
怯懦料和起尚不至此此必出於錫特庫之意着傳
旨申飭仍將訥默庫曼集烏達瑚們都即行正法十
一月輝特台吉巴雅爾叛掠扎哈沁五百餘戶定

邊右副將軍兆惠令和起率索倫兵百往勦檄吐
魯番伯克莽阿里克及厄魯特兵集闡展而噶勒
雜特宰桑哈薩克錫喇布魯古特台吉呢瑪陰應
巴雅爾詭以兵千五百會和起望兵至疑之令莽
阿里克往偵給告曰我兵也逾時呢瑪等操戈前
莽阿里克自後譟賊衆彙集我兵僅百人負重創
和起手及數賊股中鎗徒步轉戰至夜力盡死之
遺命索倫侍衛努古德彰金布突圍出以所戴孔

雀翎為識往告巴里坤大軍兆惠以

聞

諭曰和起効命疆場捐軀報國忠節可嘉深為憫惻着
照傳清拉布敦之例加恩贈卹

上憫和起義烈

御製西師詩有奮勇沙場沒之句尋追贈一等伯

賜祭葬入祀賢良昭忠二祠謚武烈

賞一等子爵以其子和隆武襲二十三年逆賊呢瑪及

其子就擒

命於和起墓前伏誅和隆武初襲子爵授三等侍衛乾隆三十六年襲佐領三十七年二月隨護軍統領明亮赴金川軍營七月隨大軍由墨壘溝攻甲爾木山梁十二月大軍分路進剿和隆武為領隊侍衛時明亮等攻美都喇嘛寺和隆武沿河夾剿賊潰復合盡殲之夜克美諾各碉寨三十八年二月分攻納園正面山梁六月海蘭察剿賊於簇拉角

克五岱統兵援和隆武為接應七月敗賊於鳩寨
奪碉五十餘八月授鑲藍旗蒙古副都統十一月
克復僧克宗三十九年正月隨富德攻克絨布寨
正北之沃什山摩格孟格哩格穆爾德宗進攻卡
卡角是月署古州鎮總兵三月同奎林等衆七日
糧分隊取斯第賊迎拒和隆武麾衆力戰矢盡以
矛槍格鬪被創事

聞奉

旨嘉獎

賜玉韉荷囊六月調征正地九月攻木克什克第一碉
賜皮馬褂十一月大軍攻日旁和隆武由周叟統出其
後突入碉寨賊驚潰鎗石不及施短及相搏我兵
沿山追勦克戰碉十餘平碉二百餘日旁賊殲焉
諭曰此次明亮等攻克日旁碉寨探路籌畫均合機宜
而越險攻碉殺賊全係和隆武功績伊父和起盡節
捐軀應有是予深為嘉慰著授為都統以示優獎和

隆武尋偕珠爾格德等勦谷爾提一帶碉寨盡克之

諭曰此次攻得碉寨又係和隆武帶兵前往似此屢次出力實屬可嘉四十年正月授正藍旗蒙古都統四月分攻得楞以南碉卡復與奎林等由薩克薩谷進攻追殺無算六月攻額爾替山梁石城殺賊甚衆

諭獎其奮勇出力七月賊據石真噶和隆武與奎林乘

運礮聲囂分隊突攻據之賊奔潰時將軍阿桂一路兵直壓勒烏圍之頂和隆武等張兩翼亟進為聲援八月賊恃扎烏古險要於丹扎木各寨悉眾拒守我兵出其不意取路深入和隆武沿河接應夾攻十月由琅谷攻奪什扎古

諭曰此次攻碉殺賊官兵均為奮勉而奎林和隆武二人出力尤多現在西路將領隨將軍阿桂屢次克捷立功建績者甚衆將來自膺茂賞而明亮北路久未

能進即此次亦不過尋常小勝不能遽邀錄叙明亮
奎林和隆武各宜奮勉立勲豈可專讓西路成功而
不知奮勵但進攻時當度其利害籌及萬全閏十月
克扎烏古及耳得谷十一月克阿爾古十二月由
達撒谷進攻克荒子坪一帶碉卡復攻獨古木思
滿賊望風披靡

上和隆武鼓勇先登茂著勞績

賜諭嘉獎又攻甲雜官寨圍之賊遁乘勝克獨松四十

一年正月金川平晉封三等果勇侯

賞戴雙眼翎尋

命將本佐領擡入正黃旗四月凱旋

賜

御用鞍轡馬一及銀幣

命圖形

紫光閣

御製贊曰襲父卹職少年老成囊錐脫穎竟善用兵掠

日旁寨獨擅偉勲楚材繼出既悵以欣四十三年四月授寧夏將軍十一月調吉林將軍四十七年卒賜祭葬謚壯毅無嗣弟和雙額襲侯爵

瑚爾起

瑚爾起滿洲鑲藍旗人姓瓜勒佳雍正三年由監生授八品筆帖式乾隆四年授佐領十二年授協尉十三年隨征金川

賞戴孔雀翎十九年授呼倫貝爾總管二十年隨大軍

勦準噶爾加副都統銜二十一年正月隨叅贊大臣達爾黨阿等由珠爾都斯往追叛賊阿睦爾撒納九月偵阿睦爾撒納竄哈薩克隨定邊左副將軍哈達哈等往索哈薩克汗阿布賚拒戰連擊敗之復追及其後隊及別隊斬首百餘獲馬二百餘生擒杭吉勒圖等詢知阿睦爾撒納遁呢雅斯圖山遣諭阿布賚擒獻二十二年二月杜爾伯特屬人刼侍衛佛保

命瑚爾起擒治之五月偕叅贊大臣唐喀祿赴察罕郭勒偵禦叛賊哈薩克錫喇七月杜爾伯特貝勒巴圖博羅特等潛通阿睦爾撒納瑚爾起擒之於輝巴朗山後勦其屬及阿睦爾撒納所留烏梁海五十餘戶事

聞得

旨嘉獎交部議叙八月以兵三百接應往勦哈薩克錫喇之侍衛圖倫楚是時沙喇斯瑪呼斯既降復叛

掠臺站而布魯古特台吉琿齊等又戕我察哈爾
總管巴寧阿十月

諭曰濟爾哈朗至巴里坤適中之地着哈寧阿率兵一
千駐劄鄂實三格瑚爾起為副其琿齊及沙喇斯瑪
呼斯賊衆有散逸在附近地方者即帶兵搜勦十二
月偕鄂實追勦扎哈沁逃賊奮勇有功

諭部議叙二十三年三月偕副都統巴圖濟爾噶勒由
呼斯坦至尼勒喀河偵琿齊等百餘戶遷牧突擊

執之定邊將軍兆惠以

聞

詔獎之下部議叙四月隨大軍由伊犁進勦回部五月
抵善塔斯嶺招降布魯特頭人圖魯啟拜鄂庫及
所屬九月搜捕阿里瑪圖河逸賊十月

上以索倫兵從征年久

命瑚爾起及副都統鄂博什撤還瑚爾起等懇請隨勦
允之時將軍兆惠勦回苗霍集占於葉爾羌被圍定邊

右副將軍富德檄瑚爾起及巴圖濟爾噶勒率索倫兵由伊拉里克前進因馬駝未至負糧械步行戈壁中

諭曰瑚爾起等所領官兵皆應撤回更換者昨因懇請前赴軍營已諭照初次出兵例頒賞今又不候馬駝步行速進奮勉可嘉瑚爾起著補授正白旗蒙古副都統巴圖濟爾噶勒現任副都統着加恩授其弟恩克阿穆爾為藍翎侍衛仍曉示官兵勉効前驅以膺

恩賞二十四年正月抵巴爾楚克兆惠已與富德軍
合適霍集占逆黨阿卜都克勒木等侵和闐侍衛
齊凌扎卜請援兆惠令瑚爾起及巴圖濟爾噶勒
以兵九百往勦三月偵賊騎七百餘據博羅齊乘
霧突擊潰之追至阜窪勒河斬賊百餘收回人四
千餘戶和闐底定

御製博羅齊行詩紀其事載巴圖濟爾噶勒傳瑚爾起
以功授雲騎尉世職七月大軍由喀喇烏蘇追勦

霍集占至阿爾楚爾賊設伏兩山間我軍張左右
翼擊之中軍發大神礮賊敗走三十里據一山瑚
爾起等自山麓橫衝大軍齊進斬阿卜都克勒木
賊大敗越山而遁八月尾追至巴達克山界之伊
西洱庫爾淖爾瑚爾起等各領兵百設伏東山一
帶大軍夾勦大敗之霍集占竄入巴達克山未幾
巴達克山汗素勒坦沙函獻霍集占首瑚爾起分
領索倫兵還二十五年二月

賽銀幣七月疏言呼倫貝爾多水泉可耕請於新降塔
里雅沁回人內選百名往引水灌溉

詔如所請行即

命瑚爾起以副都統為呼倫貝爾總管董其事二十六
年

命圖形

紫光閣

御製贊曰突擒琿齊其氣如虹及降勃律烏幕占風解

圍和闐戰鏖大食麾蓋而登威著西域二十九年調
黑龍江副都統三十四年從征緬甸收服猛拱猛
養等處以病卒於軍營

諭照陣亡例議卹給騎都尉併前世職為一等輕車都
尉

賜祭葬入祀昭忠祠子富勒赫襲世職

鄂容安

鄂容安滿洲鑲藍旗人大學士鄂爾泰長子雍正

十一年進士改庶吉士軍機處行走乾隆元年授
編修在

南書房行走二年遷侍講三年七月充

日講起居注官十二月轉侍讀五年六月擢詹事府
詹事時鄂爾泰承

旨奏辭再三

諭曰朕之用人悉秉至公毫無私意於其間古云非喬
木之謂有世臣之謂蓋以大臣子弟果能立志向上

諸事黽勉斯能不愧世臣可以為國家宣力朕觀鄂容安及大學士張廷玉之子張若靄朱軾之子朱必堦皆能遵守家訓祇受國恩况鄂容安張若靄向蒙皇考命在軍機處行走原欲造就成人此次擢用乃朕量材加恩即裁者培之之道鄂爾泰不必以己意固辭

八月

命入尚書房隨福敏行走七年以與聞左副都御史仲永檀密奏留中事革職八年

命仍在尚書房行走補國子監祭酒九年

命偕刑部尚書來保往奉天同侍郎兆惠會審奉天將軍額洛圖扣餉勒派等款得實論罪如律十年署兵部右侍郎襲父三等伯爵十二年五月授兵部左侍郎九月以與尚書彭維新等議處總兵高琦武備廢弛一案違例邀譽奉

旨訓飭部議革職得

旨從寬留任十三年三月充會試副考官四月兼翰林

院掌院學士尋兼管國子監事十月署河南巡撫
十二月以辦送金川兵差妥協議叙

賞孔雀翎十四年正月疏陳文武各員優劣

上嘉之四月河臣顧琮往署總漕

諭鄂容安就近料理豫省河務九月疏言豫省有伏牛

山居嵩山南界連秦楚二省袤延八百餘里山多

箐密臣於查閱營伍之便自邾縣汝州至伊陽縣

渡汝水入伏牛山經十八盤等處至孫家店閱兵

復由分水嶺等處至嵩縣出伏牛山親歷查看飭
各員弁不時巡查該管道員嚴加督察再豫省各
關其近秦省者陝州有硤石關靈寶縣有函谷關
閿鄉縣有大谷關近楚省者淅川縣有荆子口關
信陽州有平靖關桐柏縣有犁耙口俱通商大道
恐奸宄藏匿現飭行保甲嚴斥堠

諭獎其諸事認真實授河南巡撫時衛輝叅將阮玉堂
因操演鞭責兵丁過甚致譁鄂容安以玉堂失職

應題叅但兵丁甫經喧鬧遽叅營弁恐啟驕悍之漸奏請嚴拿兵丁分別首從定擬後解王堂任

上是之十月疏言豫省常平倉穀前准部咨以雍正年間額貯二百三十一萬九百九十九石為準除實存并借糶抵補外計缺額穀二十九萬七千四百石有奇應收捐補足臣思倉穀期實貯而地方繁簡不同豐歉各異宜乘此定額之際將各府州縣應貯穀數勻派開封府貯二萬石歸德陳州懷慶

南陽彰德衛輝六府各貯一萬五千石河南汝寧
二府各貯一萬五百石戶口最多之許州等二十
七州縣各貯二萬五千石其次通許等五十五州
縣各貯二萬石又其次河陰等二十七縣各貯一
萬五千石統計適合雍正年間定額至各府州縣
原貯穀較現派額溢者糶價提解司庫撥補未足
額者此次額穀補足後將來有餘另案存貯遇賑
卹并平糶未買以此撥補現在溢額糶價已敷提

解者全提不敷者於明歲春糶案內補提其缺額之區所撥穀價如秋成後本地米價未平即於鄰近價平處買補既與定額相符又使緩急有備部議允行十一月

賜所襲伯爵號襄勤十五年二月疏請將省會城門鎖鑰歸城守尉掌管

允之四月奏言開歸陳三府地勢窪下多水患非開濬溝渠不足資宣洩臣查開封府屬泉水所歸之河

曰賈魯河發源於滎陽縣聖僧池各泉惠合索須
京三水成河厯開屬之河陰滎澤鄭州中牟祥符
尉氏陳屬之扶溝西華至睢寧之周家口入大沙
河其附以東注者則有鄭州之金水河七里河磨
河欒河洧川之杜公河接入尉氏之太溝河康溝
河陳屬扶溝之雙泊河蔡河西華之清流河皆挈
兩屬溝渠之水而同趨於賈魯河此開屬洩水之
幹河也陳州府屬衆水所歸之河曰大沙河發源

於汝州屬魯山縣伏牛山之莫大嶺厯南陽府屬之舞陽許州屬之郟城而入陳屬之西華商水睢寧項城沈邱以入江南太和縣下達於淮其附以東注者則有西華商水之渚河扶溝太康西華睢寧之清水河太康睢寧之古黃河枯河睢寧沈邱之蔡河皆挈本屬溝渠之水而入於大沙河此陳屬洩水之幹河也歸德府屬下游有渦河而惠濟一河據其上游諸水由惠濟以入渦河者居多惠

濟河自開屬中牟縣西十五里鋪分洩賈魯河之水由祥符陳留杞縣入睢州經柘城至鹿邑入渦河以達於淮其附以東注者則有儀封睢州柘城之老黃河陳留杞縣之坡河接入杞縣之橫河杞縣睢州之桃河司家河太康柘城之沙河皆挈三屬溝渠之水而同趨於惠濟河以入渦河又鹿邑之清水河下接淝河由江南之太和縣以入渦河又有濯河即黑河由茨河厯江南之蒙城縣入渦

河則是渦河又為歸屬洩水之幹河也統查諸郡
幹河如賈魯河大沙河渦河俱各深通惟惠濟一
河上流尚須開濬資蓄洩其各支河內應行開濬
者開封則有鄭州之金水河七里河中牟之轥河
祥符之城東乾河蘭陽儀封之周家河李家渡口
尉氏之乾河陳州則有太康之燕城河西華商水
之渚河睢寧之東西蔡河枯河古黃河項城之蔡
河泥河歸德則有寧陵之舊沙河考城商邱之沙

河睢州之橫河桃河司家河姬家大坡河鹿邑之
清水河黑河以上諸河皆為承受溝洫貫注幹河
之要道此內有止須疏濬即可通流者有應擇地
改挑者有應逢灣取直者有僅存河形必須另挑
者有道里較長土方較多猝難竣事者酌量工程
難易或分年帶挑或借給口糧酌量民力籌辦毋
庸動項惟陳屬項城受汝寧屬上蔡洪河減水之
害或謂搭橋攔阻水勢應拆改木橋或謂竹絡壩

減水過多應另建石壩臣以為其害不在於橋身之阻水亦不在竹絡之多洩因橋之西牆過寬挑水東注所致止須將東西牆改做一律使洪河減水南歸茅河黑河之水東歸蔡河兩河分洩自無泛溢之虞至汝寧府汝陽縣亦以洪河為患查向來西南山水盡歸乾江河自鍋埠口決山水盡入汝為害臣飭令照舊堵塞使山水全歸乾江河則洪水已減自能容受至歸屬永城之巴溝河下接

江南宿州砂礮灘此工關涉兩省應俟江南咨覆
興工臣於各屬挑濬處每年底查核勤惰或附叅
或保薦使工員咸知慎重庶沮洳漸成膏壤

諭曰如此留心本務方副委任之意勉之十月

上巡幸河南鄂容安奏紳民感沐

皇仁情願捐輸共收銀五十八萬七千餘兩充公用

諭曰朕時巡方岳一應道路橋梁等費皆准開銷正項
從無絲毫累民之事即城垣祠廟有應黝堊灑掃略

為整葺者祇宜動支帑項即其間或有開銷不到之處現經賞給該省公項銀兩以資通融辦理之用曾何藉于輸將鄂容安此奏甚屬錯悞因其據實陳明尚不至蹈欺隱之咎猶可稍寬但朕省方問俗勤恤民隱尚慮休助之弗周豈容供用轉資於下鄂容安不能仰副朕意殊失政體着傳旨嚴行申飭紳民樂輸之項俱着給還鄂容安奏樂輸實出至願如復行給還非特不肯領回且頭緒紛繁難免胥吏中飽

懇請聽其所願至辦理之初並未具奏實屬錯謬
伏祈嚴治臣罪

諭曰朕巡方問俗蠲復頻仍惟慮德意未能徧逮一切
供頓絲毫不以累民前降諭旨甚明鄂容安惟知下
情踴躍輸將遽行冒昧從事本應嚴行治罪但既經
據實陳奏究與有心欺隱者有間情尚可寬且以陸
績輸公之項復令紛紛具領恐奸胥滑吏從中舞弊
轉以飽其欲壑此語亦頗近是則給還之事實屬勢

所難行然辦理失宜欸項無凭稽覈以閭閻尊君親
上之忱適足資其糜費侵用是又始終不能仰體朕
意獲罪尤甚者矣着鄂容安將蠲輸銀兩作何辦理
之處詳悉查明繕冊送軍機處逐一察核毋得稍有
朦混十一月

諭曰朕於昨日回鑾今日見河南布政使富明奏請陞
見一摺援藩臬三年期滿之例伊於行在召對數次
並非三年未見者比不應糊塗至此鄂容安前奏富

明辦事勇往在豫省頗稱得力朕一見即曾諭鄂容
安其人小聰明不可信汝勿為其所賣今觀其奏請
陞見一摺一則見其不與巡撫扶同二則希圖於召
見時却責鄂容安其居心不可問如此鄂容安至今
應服朕之早識而恨已之為所愚也然以如此之人
而信任之無怪中州今歲所辦之不能仰體朕意矣
設果出自鄂容安一人之意富明身任藩司即當勸
阻如其力爭不得何妨於朕未至中州之前或行在

召對時據實奏聞朕必將鄂容安治罪而擢伊為巡撫乃當時既已商同辦理及見朕責鄂容安之辦理不善於回鑾後為此巧獍伎倆何能逃朕洞鑒朕謂其人不可信果何如耶再今日方觀承具摺謝恩而鄂容安於朕回鑾至保定及進宮已請安兩次而不置一言夫直隸係巡幸常經之地方觀承即不具摺謝恩亦無不可至朕之加恩於鄂容安實出於格外包涵鄂容安宜如何感激沒身頂戴何以竟似無事

即謂方觀承僅屬外吏虛文鄂容安身係滿洲受厚
恩棄虛文積習可也豈獨無不能自己之情耶若謂
其有心疎畧亦未必然因責其辦理不善心懷疑懼
思欲含糊了事此豈含糊所可了者耶著傳諭鄂容
安令其痛加改悔據實查核逐一清晰無絲毫糜費
絲毫粉飾以為補過之地十六年三月疏叅歸德府
鄉紳雲南布政使彭家屏原任江蘇按察使李肖
筠抗糧至七千餘兩得

旨罰追革職從寬留任先是湖廣總督永興與布政使
嚴瑞龍先後疏叅湖北巡撫唐綏祖婪贓累萬奉
旨革職拿問永興尋丁憂回京

諭新任總督阿里衮嚴審至是阿里衮奏瑞龍收受
平餘等欸

命鄂容安赴楚會審四月合疏叅奏永興於進京時私
受贖賄

詔革永興職交部治罪五月審明綏祖並無婪贓情事

惟縱容爐頭私買銅鉛添鑄瑞龍收平餘四千八百兩入已屬實

上以鄂容安等未得辦理此案之正法

命給還綏祖家產來京候旨錄用並

命刑部另擬永興等罪尋議瑞龍改照誣告人死罪律

擬斬候永興減一等擬杖流枷責從之鄂容安尋

疏言河北鎮屬九營暨臣標左右二營公費不敷

查蘭陽等十縣官租積穀不過二萬餘石存銀不

及四千兩各州縣既有常平社義等倉民食原不
藉此接濟請撥歸營軍機大臣議行八月調山東
巡撫時濟南府屬夏秋被水糧價昂而沿海之登
萊青三府地僻山險轉運尤難鄂容安奏請照乾
隆十三年例暫弛海禁招商前往奉天糴運以資
接濟商船出入照例稽察得

旨允行十二月與河臣顧琮等合疏言張秋挂劍臺漫
口因豫省陽武堤工泛溢黃水穿運入海現在陽

武工竣張秋一帶水勢日消但西陂來水從冰底
原原下注今堵塞漫口須使有所歸宿方無壅滯
查漫口迤北有減水閘壩三可由分洩入徒駭河
戴灣閘以上閘壩涵洞四可由分洩入馬頰河又
有戴灣閘臨清磚板二閘入衛北流俟水勢大減
仍將戴灣閘下板嚴閉俾盡從徒駭馬頰二河宣
洩入海漫口迤南有素東汎三空橋可由分洩入
鹽河又有五空橋原係分洩運河淤漲但橋底甚

高不能過水臣等相度於其北築攔河壩一長二十餘丈並於橋南挑引河導水由鹽河歸海俾西陂之水南北暢流消涸更易下部知之十七年二月奏言運河全堤自台兒庄至德州千餘里素稱卑薄每年伏秋兩汛兼風雨浸汕又漕船往來下掘施犁日漸殘塌臣與顧琮會籌應及時估修計需銀十五萬三千餘兩又運堤向無堡房應照黃河例每二里建堡房二需銀二千一百八十兩至所

修工程原以保固為重而犁溝櫟眼及水溝浪窩
尤須隨時修補並於漕船過後通查增修庶可垂
久三月又言太行堤在黃河北岸大堤之北兩堤
相去數十里中有河一道本以宣洩夾堤以內坡
水順流而東達江南豐沛二縣入微山湖因年久
淤塞堤內田廬淹沒雍正年間於太行堤建涵洞
使堤南之水穿堤北行經定陶城武單縣魚臺等
邑入昭陽湖以歸微山湖嗣因涵洞旁冲缺口定

陶等邑俱受水患是此涵洞必應堵塞庶太行堤仍舊完固為黃河重垣保障至兩堤夾束中間之水亦應開通舊河使東注免漫溢報

聞四月奏言東省庫項多不清其交代流抵之弊率以辦差墊用為辭仍飭屬作速核銷至常平社倉糶借穀石未歸補者甚多有因州縣恐穀石霉變強派民間者有希圖染指不暇詳查徒為無業之人領去者有村莊離城寫遠為胥役冒領者有因社

穀並無倉廩散交地方致強半虧缺者有因積欠
難催恐干督責捏報新借以淹舊欠者凡此皆宜
嚴懲但操之過促恐劣員怙過飾非徒有追呼之
擾究無完補之益而人情急則無賴更或別啟釁
端已令藩司責成各府確查妥辦臣仍不時體察
如玩徇料理不清者知府一併嚴叅得

旨嘉獎十月署江西巡撫十一月即

命調補時上猶縣逆犯何亞四等就獲鄂容安按擬如

律因親往勘地勢奏請移千總一駐上信地於營
前城防兵內撥十五名鎮標二十五名往駐下信
地亦於附近別營撥兵十名駐守營前留把總一
兵三十名聯絡聲勢改浮龍司巡檢為上猶縣縣
丞仍駐營前龍泉縣禾源司巡檢改駐龍猶接壤
之左安村崇義縣上堡司巡檢改駐金坑下部議
行十八年正月

諭署兩江總督印務即在江西辦理九月奉

旨實授十一月會同

欽差侍郎嵇璜德爾敏查勘高家堰堤工並赴下河一帶籌辦疏濬事宜十九年正月奏言江南地廣事繁胥役最多作弊臣遵

旨於勘災途次留心察訪查得淮安等府屬有藉賑弊混得贓分肥者蘇州等府屬有收漕舞弊婪贓者徐州府屬有差辦工料滋弊者但作弊雖出於胥役而州縣豈皆聾瞶除將各犯嚴拿審擬如本官

於中染指及知情故縱者嚴叅治罪卽失察亦分別辦理示警至胥役原有經制名數酌設副役并載入冊乃江浙胥役非冒缺頂補卽永遠充辦一役在冊外有無名白役數名至十數名者倚官作威因公訛詐大為吏治民生之累現飭各屬稽查務符定額嚴禁頂補朋充俾易約束得

旨嘉獎先是刑部覆准廣西等省先後條奏印官公出令佐雜相驗命案一事經江西按察使范廷楷疏

請仍令鄰邑印官驗報不得濫委佐雜得

旨交鄂容安酌行至是覆奏言命案惟兩邑相距寫遠
印官公出而鄰邑印官正值乏員方許佐雜往驗
立單仍由印官覆核毫無疑竇始填圖通報並將
因事公出及屍所距隣邑若干里各緣由聲明倘
佐雜相驗不實印官扶同填報一并嚴叅

詔如所議行三月奏沿海塘工前經撫臣莊有恭查勘
估辦俱妥惟林家嘴頂衝應於堤後幫寬培厚以

資捍禦又寶山縣舊城灣月堤張家浜抄塘及劉
河七浦二河原閘座俱應修築報

聞四月加太子少傅時部議刪除武職空銜將江南省
五遊擊缺改都司行令酌議何營應改鄂容安奏
言蘇鎮右營遊擊所管汛有守備分防改設都司
足資辦理狼鎮左營遊擊兼轄城池關廂水路改
設都司儘堪彈壓壽鎮左營遊擊較簡於駐防宿
州之守備今將遊擊酌改都司駐宿州即以宿州

守備移駐壽州廣德營遊擊兵少事簡漕標左營
遊擊僅司催漕俱可酌改都司部議從之八月

上以杜爾伯特台吉策凌輝特台吉阿睦爾撒納等先
後來降

諭曰年來準噶爾內亂頻仍人心離散屢有大隊輸誠
內嚮正可乘機辦理永救邊境鄂容安年力壯盛勇
敢有為一切緊要機宜尚能曉暢着速赴行在面聆
指授赴軍營辦事十二月授西路叅贊大臣與總督

劉統勲籌辦糧馬二十年正月定邊右副將軍薩喇勒領哨探兵由西路進剿

命鄂容安同進二月

諭曰漢時西陲塞地極廣烏魯木齊及回子諸部落皆曾屯戍有為內屬者唐初都護開府擴地及西北邊今遺址久湮著傳諭鄂容安此次進兵凡準噶爾所屬之地回子部落內有與漢唐史傳相合可援據者並漢唐所未至處一一詢之土人細為記載以資採

輯四月同薩喇勒奏臣等沿途招降各部人衆並遣
侍衛塔奇圖等齎檄往諭達瓦齊降

獎賜荷包鼻烟壺五月大軍定伊犁

諭曰準噶爾平定兩路將軍大臣等朕俱已加恩鄂容
安在叅贊大臣任內行走亦應加恩但伊從前有準
噶爾不宜辦理之議伊父鄂爾泰與大逆胡中藻師
生交結伊兄鄂昌又與胡中藻附和黨同鄂容安明
知其事不為陳奏有負朕恩伊若不前往軍營原欲

從重治罪今因此行走免其治罪即係朕恩可傳
諭鄂容安知之是月大軍渡伊犁河直抵達瓦齊所
居之格登達瓦齊遁鄂容安偕喀爾喀郡王品級
青滾雜卜等收其游牧獲達瓦齊之叔及其孥並
喇嘛六千餘六月達瓦齊就擒鄂容安同班第駐
守伊犁時阿睦爾撒納為定邊左副將軍蓄異志
謀據伊犁鄂容安同班第密疏劾之

諭趣阿睦爾撒納赴

覲熱河

命鄂容安與薩喇勒以兵至塔爾巴哈台相機擒治會
阿睦爾撒納行至烏隆古叛逆黨應之台站斷鄂
容安同班第被陷力戰自盡都統策楞以狀

聞

上軫悼即令其次子鄂津襲裏勤伯爵二十一年極至
京

上親臨奠醊入祀昭忠祠

賜祭葬如例謚剛烈

特建雙烈祠

御製詩旌之並

諭誡逆黨阿巴噶斯克什木耳於樞前祭奠並詳見班

第傳二十六年

命圖形

紫光閣

御製贊曰世臣知書料善論兵惜弗通語遂弗燭情變

起倉卒力戰命畢用違其材實予之失三十七年鄂
津在伊犁領隊大臣任內以私派隨人種地革職
其世爵以鄂容安長子鄂岳襲現任散秩大臣

常祿保

常祿保滿洲鑲藍旗人姓赫舍哩雍正十三年由
閑散襲其遠祖德祿軍功所給騎都尉世職乾隆
十八年授三等侍衛二十七年授直隸居庸路營
都司三十一年調正定鎮王家坪都司三十五年

遷四川提標左營遊擊三十六年從征金川三十
七年遷成都城守營叅將隨副都統海蘭察等進
攻得拉密色欽山梁賊潛伏密林內常祿保往來
衝擊之十月隨定邊將軍溫福等攻明郭宗附近
山梁議叙功加一等紀錄五次十一月大兵進攻
路頂宗之喀木色爾寨常祿保隨海蘭察由山南
大澗潛越山頂克之殲賊無算復進取博爾根山
仰攻克木城受石傷溫福等上其功得

旨賞戴孔雀翎三十八年六月隨副都統阿爾素納等
分路進攻昔嶺大碉賊百餘從傍衝拒常祿保督
兵橫擊敗之七月駐日隆要隘三十九年二月授
甘肅河州副將三月定西將軍阿桂等攻克羅博
瓦常祿保駐防山巔賊九百餘乘雪夜分兩隊潛
刦常祿保營四面環攻勢甚偪常祿保箭射鎗刺
督兵力戰禦之被鎗石傷賊竄入卡內者皆殲之
副都統烏什哈達等先後援至常祿保勇氣倍增

率陝甘官兵內外夾攻賊敗竄

諭曰此次賊衆潛來刼營經官兵奮勇合擊痛加殲戮甚屬可嘉常祿保功績尤為出衆着賞給西爾努恩巴圖魯名號賞銀一百兩並着以總兵陞用遇有缺出即行補授尋授廣東高廉鎮總兵四十年七月分攻舊則大海各碉賊掘壕排松簽鹿角脩禦甚嚴常祿保分兵出賊後併力合攻各碉卡同時克復偕總兵官達色秉勢合攻雅木則碉克之九月大

兵由達烏達圍繞道分七路進攻達思里噶拉宇
山梁常祿保率兵各路接應攻獲碉卡甚衆十一
月大兵分五路仰攻科布曲山梁賊死拒鎗石交
下常祿保被傷猶力戰歿於陣事

聞

賜祭葬如例

命圖形

紫光閣儒臣擬贊曰雪夜賊來犯羅博瓦恚力殲擊

傷因兵寡苗則大海賊後繞攻捐軀科布敢戰名

雄尋

恩蔭其子瑚松阿為都司襲騎都尉世職

欽定八旗通志卷一百八十二